

江西詩徵

江西詩徵卷五十四

南城曾煥賓谷編輯

明

劉玉

玉字咸栗萬安人博通載籍長於天文地理兵法
之學宏治九年進士除知輝縣入爲御史正德初
以抗論劉瑾罷歸瑾誅起南僉都御史轉刑部侍
郎卒贈尚書諡端毅有執齋集

寄挽陸水村

垂老南遷已斷魂更堪荒草塞孤墳鄒陽尚恐吳藩重袁
盎寧忘漢室尊千古是非勞士論百年榮辱悞君恩交遊

落落誰青眼獨向天涯酹酒尊

夜坐

暝色闌琴書開軒對明月微雨卷薄雲疎星粲成列孤蹤
棲鳥定羣響蟲聲歇緬懷塵外人高枕宵鐘徹

秘獄

牆隙風來無蹤翻書卷衣袂使我燈燄閃爍如青蟲嗟風
伯來何從清明明庶成化工乾坤大噫土囊小胡爲牆隙
如吹筒嗟嗟風伯省厥躬

百舌

百舌鳥何佻巧啼遍上林音裊裊雌鳩喚雨雄鳩晴鷓鴣
欲住鷓欲行一鳥一舌尚難定爾有百舌能無爭人生言

出慮禍入一言之失駟不及三寸舌在中禍幾啗爾百舌
無是非

志怪

紀歲丁丙戌夏四月廿六靖浪之民家黃特身孕犢一項
而二首各具口耳目五月十四日丙申金壇農婦生怪人
頭方四角面青而六眼高額四鼻獠牙鳥啄如山精手足
一節具一爪墮地鬼叫人失聲歛然起走擊乃斃創見此
怪吁可驚七月望仍丙申日異牛又產南陽邑二首相同
項亦分心肺雖殊身尾一聞之嗟嗟稽占書無乃世降生
形殊反身修德天可格祥桑枯死安無虞

石鐘山歌

石鐘山何高哉雙巖競秀江之隈初疑端人秉笏立朝署
又疑靜女把鏡臨粧臺長江萬里如奔馬彭蠡淵泓匯其
下乾坤陶冶質本虛波濤撞擊聲非假春風浩蕩秋月明
蛟龍鼓舞鯨鼉鳴或如巨鏞震東序或如棧劇和琴笙水
石相搏豈人力石鐘千古留佳名山僧叩石誇奇絕南音
含胡北清越山川靈異石偶同至理寧容三寸舌我來訪
古將誰從酈元李渤東坡翁枕流洗耳了無得倚闌目送
雙飛鴻忽憶高皇此停蹕龍旗一奮羣兇畢鐘乎鐘乎爾
善鳴爲予迅掃磨崖石

聞甘肅有警寄榕溪公

驛吏傳邊報羌人犯肅州極知兵士苦誰解聖明憂調集

晨分竈供輪夜唱籌早期青海靖定遠舊封侯

寄咸肅兄

江頭日日候歸船南北東西路幾千旅館夢迴常徹夜故園書去動經年愁連郢樹雲初合思入湘潭月又圓莫道少年堪久別高堂華鬢亦蕭然

越王臺

章貢江流去不回江邊今有越王臺年深往事憑誰問春盡野花空自開落日每隨孤鳥沒好風時送片帆來登臨却喜青山在猶勝阿房化劫灰

送行

日日都門送別離道傍楊柳已無枝西飛白日東流水不

放行人住少時

懷歸

鑑湖之水清且漣中有二頃桑麻田故人有約不歸去老却黃花又一年

回龍驛

緯路遶村斜舟行聽早鴉負囊趨遠渡提甕立平沙日出雲生葉風回浪起花太行天際碧吾亦憶吾家

歸途

晚晴回玉勒歸路擁瓊花紫霧蒸山氣清輝蕩日華削波冰掛壁髡樹凍凝槎勞役何須問窮生更可嗟

世降

六籍逮狂秦三王迹已陳虞淵初息駕滄海又揚塵猿鶴
昔君子豺狼有故人祇存丹竅理常與日華新

宿房村下

歷歷長亭樹舟行泊未曾歸雲依疊嶂落鴈響寒營古渡
稀聞棹孤村遠見燈壯懷慙旅客禁漏憶晨興

謾興

縛茅爲屋倚山椒名姓人傳太古樵白石曉炊雲出甌
泉夜汲月盈瓢釣魚懶過雙溪堰驅犢時臨獨木橋寄謝
長官休物色多年洗耳向唐堯

大梁城

大梁城上四無山渺渺驚行萬里間宋苑梁臺何處是黃

河流盡鳥飛還

新春謾興

杖藜門外問浮槎路隔溪南處士家
梅子漸肥梔子瘦流鶯啼盡雨中花

熊卓

卓字士選豐城人宏治九年進士授平湖知縣正
德初徵拜監察御史因天變屢上疏言事巡按廣
東以忤劉瑾致仕卒於家有熊御史詩選

和何仲默遊靈濟宮韻

乍識花源路蕭然世外居
玉壇秋雨冷紫閣晝陰虛
餐玉傳奇訣抄方檢異書
却憐城市客羈束未能疎

懷京友

閨苑十年同會好
滄江千里獨栖安
燕臺遠樹春雲暗
楚館繁花晝雨寒
不分山鐘搖夢促
無端海鶴度書難
傷心桂棹風波隔
日晏空歌澧有蘭

和老杜曲江對酒詩韻間遺

野老山雲去復歸
滄江心事與依微
高天院落風花亂
遲日樓臺燕雀飛
病裏豈知人事改
憂來惟覺宦情違
春光日日催行棹
草色河邊上客衣

送人赴道州任

月照河臺酒離情
那可消衡陽飛鳥盡
君去更迢迢

送王衍之還陝和廷實韻

擾擾郊門道沙寒驛路微煙花行路晚京洛故人稀野岫
孤雲沒春山獨鳥歸秦川隱關塞一望一沾衣

出居庸

沙上望行人日暮愁心絕江南四時春邊地五月雪

送客城南

楊柳河橋外春風倒玉壺離情不可道江路滿蘼蕪

何正

正字立經新淦人宏治九年進士官大理丞以按
隆平侯爭襲事忤劉瑾罷歸瑾誅起河南按察僉
事平河洛寇擢山西副使乞病詔進按察使致仕
歸

讀書臺

讀書臺古傍禪林晉室名賢此惜陰用世有才期報國傳
人幾輩歎知音空齋覽冷閒朝暮斷砌碑橫閱古今解綬
歸來餘感慨追陪冠蓋復登臨

范兆祥

兆祥字廷和豐城人七歲賦登堯山詩以奇童稱
宏治九年進士授檢討應詔言事因涉官禁下錦
衣獄出爲涇府長史疏論安民社三事王嘉納之
以不附中人復下獄謫戍永州放歸卒

分寧道中

寒水澗頭花亂開燕子石下波縈迴獨鞭瘦馬截流去鶴

鳥一聲山雨來

送張少尹還武寧

昔負琴書至今携劍佩歸一箭秋水闊數點白鷗稀入世
無官好沿江有淚揮到家風日美晚圃蒨苗肥

馮希哲

希哲彭澤人宏治十年貢於鄉官福建邵武通判
著直聲致仕歸有詠物比題詩集

潛玉洞

靈谷產璠璣鎔光別一區生烟應幾處得月定何如冰雪
消磨後風塵拂拭餘儻歸良匠手製獻計非虛

賴

聰一作聰

聰南康人宏治十一年鄉舉官開封府通判

感恩祠

小醜胡爲者憑陵敢自支聚羣涼月嘯挺險亂山馳遂有
三軍命爰興六月師貔貅屯士卒蛇隼動旌旗橫草真無
敵摧枯正及時蜂房高下破狐穴淺深移舞幘多黃髮殲
俘過赤眉古碑鐫瀚海新棟擬羅池合配千秋享來伸一
拜私甘棠休剪伐畱蔭廟門枝

俞雍

雍信豐人宏治十一年貢於鄉授將樂主簿

香山

平生幽興愛方壺行藥重來路未蕪舊社九人皆脫略當

年一鶴最清癯荒烟冷澹隨秋遠皓月空明上樹無料得
山靈舊相識掀髯長嘯海天孤

俞紳

紳信豐人宏治十一年貢於鄉官順昌丞

南山寺

野雲重疊護南山一徑松陰向水灣碧甕喜成今日醉白
頭應笑此身閒偶尋世外雲烟境已破人間夢覺關竹杖
芒屨渾落落夕陽亭上片鴻還

張九達

九達字天衢大庾人宏治十二年進士由揭陽縣
擢禮科給事中值劉瑾誅疏除諸苛法累官廣西

參議有征蠻功冒瘴病卒

題湛泉

一掬寒泉萬古清
湛然亭下寄高情
夢回塵鞅應何日
獨帶江雲自濯纓

張恩

恩字元錫號兩山南城人
昇子宏治十二年進士
歷廣東參政按治惠州
巨惡十餘人又奉撫鎮
檄督勦山海寇大捷累官
浙江左布政致仕歸

福勝寺

暫拋書卷此間遊
古寺蕭條境亦幽
雲樹幾株堪繫馬
月池一掬可容舟
黛痕瘦處秋將老
泉響喧時葉自流
爲愛

老僧能習靜
扃門未許俗塵收

江湖

潮字天信貴溪人宏治十二年進士知壽州有惠
政民建生祠歷廣東僉事平連州山寇累遷右副
都御史巡撫山西以捕治妖人爲郭勲張璁等所
枉落職累薦不起隆慶中贈兵部左侍郎

東張雲坡

芒屨不肯蹋紅塵却爲江山少主人啼鳥落花三逕晚石
田菲屋四時春殘棋布置皆先著古畫蒼茫記後身自是
巢山忘世久斜陽無際隔烟津

歐陽雲

雲字從龍號碧溪泰和人生時父雍夢雲中龍見
七歲能讀語日記數千言宏治十二年進士正德
間官御史巡視南城用法不避權貴忤劉瑾褫職
瑾誅復官無意復仕家居四十餘年卒著有碧溪
集

楊文貞祠

蓋代勲名在鳳池謙冲常似布衣時魏公白日青天鑒司
馬兒童走卒知多士尚能傳素行九重安用卜稽疑文山
寂寞文忠遠俎豆非公更屬誰

符錫

錫字頴江新喻人觀子宏治十四年鄉舉判韶州

以平寇功遞遷至太僕丞後擢韶州府

雲峰居

妍彼湖上峰白雲護其端好風忽相逐暫往輒復還達士
美幽蔭逝將此盤桓時畊亦以讀得趣仍忘餐日月自相
促山中有餘閒仰盼出林翮遐哉安可攀

憩晚翠書屋

漢代有佳人寄跡鴻山下繞屋哦青松琴樽有餘暇寒日
落高陰清風起長夏顏色常自如園林任榮謝此意竟蕭
條行當息吾駕

買菊歎

秋前矜菊貴秋後歎菊賤清霜榮故枝何曾遂秋變

山莊雜興

日長蘿徑悄秋至草堂深
几淨翻書牀空抱膝吟
呼兒荷鋤出露頂憇松陰
欲共清風舉飄飄吹我衿

謾道吾廬好閒來如許忙
雨移花易活晴刷藥多良
繞逕石泉細隔林松籟長
微吟緩歸屐烟月滿山塘

送黎念齋侍御赴闕

清江渺萬里天際指皇都
繞闕雙龍迴橫秋一鷗孤
白雲迴使節紅樹促征艫
所過霜威在巴人憶得無

遣懷

秋情難遣是重陽靜裏人
驚歲月忙啼鴉風前悲落木
歸鴻天外怨新霜病懷不療
三年艾心事空餘一瓣香
但得

身閒吾願足分投書劍老農桑

月谿

山風吹月月初上山月落溪溪更清溪清月白無人曉只
有松枝分外明

雨晴再遊

縱步溪南春向闌軟風聊試袷衣寬新銓花譜應爭長夙
訂鷗盟肯暫寒垣竹別來無信報江梅折得當書看高情
遠愧同心侶佳句新傳墨未乾

和友人

采徧芙蓉憶遠汀鳩來郭外酌幽馨小山坐見團秋綠大
藥誰能駐鬢青客有可人則看竹家無一事謾談經因君

剩愛湖隄色欲買漁舟繫短亭

夢後有作

酒市歌樓夜未闌
碧雲棲夢繞鄉關
江河岸認來時路
星漢參橫別後山
紅樹送秋猶欸欸
青燈彈淚忽潸潸
何人解得垂綸手
一笑鳬鷺共往還

酬黎楚蒙侍御見寄花晨風雨遊南溪佳什

三春好日幾晴乾
不遣風花一片殘
擁樹山雲長帶雨
捲簾江閣尚畱寒
繁枝照眼知誰共
尊酒多情且自寬
莫更題詩遠相寄
恐添惆悵在東闌

友柏行爲吳肇榮賦

我聞清溪溪上之老翁
軒然鶴立羣雞中
灌園不厭藜藿

飽媚世恥爲桃李容眼中之子何足與尚友古柏窺鴻蒙
閒懷炯炯若朗月拄杖瑟瑟當秋風憶從定交來寒暑凡
幾易君節諒不移我心固匪石浮沉世態良足珍此意蕭
條竟誰識一朝物是人已非慘淡空餘雛鳳棲月明繞樹
將何托一夜秋聲滿碧溪

王 瑩

瑩字時芳金谿人宏治十五年進士選庶吉士授
刑科給事中屢建言忤劉瑾歸起兵科四川盜起
勅往視師平之卽軍拜通政使司右叅議卒於官
有青崖奏議文彙

躍馬泉

碧巘開泉路奔騰萬騎雄穿崖蹄裂石越澗勢追風神物
餘生氣山靈有戰功欲知收櫜處今古若爲空

孫偉

偉字朝望清江人宏治十五年進士授南京工部
主事陞郎中上疏言時事十六條不報出爲鶴慶
知府耳士官高才之變後解仕歸有鷺沙集

喜雨應吳大參

山下荒畬勢若焚山人望雨戴爐薰夜深初見月離畢曉
起忽傳江發雲造化驅雷從地出蛟龍卷海上天分旣汚
擬遂明農願敢作爭桑惱使君

畱酌彭敬之

清江一月風兼雨那復過從問所親久別豈堪經落日相逢還阻看花晨且將決戰東湖略細語躬耕南畝人邂逅歸舟莫催急水煙猶殢岸頭津

出塞曲

路繞飛狐西心與大力折鼓聲斷重圍斜日陰山雪陣雲隨草低殺氣傍城結何人哭遼水水上青燐滅邊色寒蒼茫老將節旄絕朔馬蹄足高踏冰如結鐵露宿黃沙戍哀笳增哽咽征人半未歸分甘死飢渴家山常在眼莫念經年別

征人莫采芑佳人莫夢蘭采芑地不生夢蘭徵驗難卽戎有簡書三年不一還城邊戈可枕塞上雪可餐寄衣是何

日縮手且忍寒烽火時一紅淚落山鬼間重氣自輕生而
暇憂摧殘君看交河水萬馬飲不乾願河向東流東流近
長安

同養齋遊慧力寺

禪房閉幽圓依依近寒城江光動林景品霧迴陰晴日晏
遠山出新松差長成客來僧自起坐久鐘亦鳴窈窕竹廊
靜時復蘭煙輕眷此同年友暫駐車馬榮契闊慰初展語
散情復縈法侶喜相偶煮茶支跛鐺碧甌濯孤興起愛綠
雲行愁澗說佳樹冷颼徐有聲且復一懽酌放歌滄浪清

登毘盧閣

秋意集高闌夕陽澹翠壑飛雲沾襟袂語笑應寥廓林響

吹霜氣時見一葉落川帆去前浦煙鳥回丹閣素懷塵外
想及此靜中樂俯仰易爲陳溪山宛如昨登臨亦是夢感
慨空悠邈黃花昧節候冷露浮青萼撫化聿申寫作詩解
禪縛

小畫

古人翳深壑孤雲時往還
崑花與藥蔓無人終日閒
泉響落林曙有路穿其間
未覺前山夕悠然還入山
幽賞盈所抱心期信一邱
林煙貯茅屋歲月懷良儔
草青不近路日斜聊繫舟
夕水涵秋白孤鴻自去留

春日遠郊

東阡一雨霽溪口聞流泉
行春愜遊事沽酒盡俸錢
林芳

鸛幽鳥澗日明孤煙不負黍稷稅耦耕今在田

仲春郊外

水香木蘭櫟日照桃花津沃轡轉遙壑餉煙吹四鄰適茲
文墨暇欣彼物華春所思屬霄漢感歎清路塵

對酒

芳樽臨楚水幽思誤濠梁
棠憩春鳩亂蘋流晚岸香艱難
瞻使節貧賤恥賓行獨有風前桂朝來借露光

松鶴壽彭敬之

靈柯百尺摩蒼穹老骨闢石如青銅長風劃然起烟壑戟
髯怒卷明霜瞳一雙白鶴好毛羽順風不羨黃鵠舉千歲
歸來問城郭南山只有松陰主松陰主人誕長生持觴愛

此青田卿何時雲間騎一隻玉笙吹月上瑤京

贈弟之蒲江縣

寒江催短日險蜀有人行窮巷違親舊衰懷托弟兄路當鴻雁別心與去帆征遠道加餐飯關河早寄聲

才人多被罪此意孰窺天身逐投荒檄心如未第年位疎惟戀闕主聖自懷賢路出巫山雨騷人莫繫船

題畫

野構延新霽輕雲放遠山酒添花木氣春與性情閒養拙無多事浮生有笑顏鳥聲渾識意只在釣磯灣

九秋風色淡水落楸花潭十步有芳酌一茅還舊龕南山今昨是野菊醉醒甘懷憤義熙後誰將此意參

元日

鼓角喧春歲已除
雪花如掌徧郊墟
屠蘇又醉王正月
童子不嫌吾舊廬
江曙忽驚山亦老
梅寒真與鶴添臞
農人愛此占年事
莫向邊關洒淚餘
梅花喜見一枝橫
瓦雀連聲報曉晴
三日泥穿東郭屐
六年人住楚江城
川融石水源源動
林宴春雲處處生
滿面條風吹不斷
閣山晴雪笠邊明

贈別廖汝謙

一自狂歌有去舟
隴雲巴月遡河流
劍光遠射峨眉雪
客思閒消鸚鵡洲
鄉國又逢聽雨夜
天涯重憶寄書秋
征衫尚帶聞猿淚
笑拂風塵季子裘

過石江子

簷外江聲落酒卮老夫攜伴過鄰時
醉醒只在荒城住憂樂空煩短鬢知
白壁夜投誰按劒綠琴心遠自調絲
清談絕倒爐熏畔野性年來似鹿麋

雨中

盡日高齋聽雨眠數聲春燕語梁邊
舊磯水漲知多少一夜清風阻釣船

石竹叢陰路不乾晚移殘興看春澗
落花風裏無人跡雨誰憐翡翠寒

階前楚尾濕氍毹屏下紅燈照暮龕
莫怪山人詩作癖却勝春雨憶江南

雜畫

村底閉門面石開青山如畫水如苔白雲久作孤舟作流
過青溪渡口來

山房小隱

此身天地一筇長語笑含風草樹香莫道入山人境絕山
前十里是柴桑

禮斗壇

莫訝仙翁躡磴危斗邊雲壑足棲遲一枝樹影容身得往
事風波似夢奇灝氣欲凌鸞鶴馭澗香新刷茯苓脂道人
相送靈巖石話到前峰月上時

曾漢

漢金谿人宏治十七年鄉舉

軍峰山歌

軍峰山山高不可攀層層秀入重霄間捫蘿歷石吾將凌
絕頂而一眺蒼崖鎖斷元雲關使我脅息雙睛閑軍峰山
山高不可攀但見芙蓉屏障接天起舒青聳翠羅立千鴉
鬟輕烟脚下浮咫尺倏忽萬變杳杳飛出長林端使我坐
歎凋朱顏結根何盤盤遠峰近峰簇闌干東南雄峙真奇
觀兩間插崑崙五嶽爭巔屹垂湍飛瀑懸巖巒六月冰雪
侵飢寒伏流轉石入肝水奔騰萬里揚波瀾豫章竹箭那
堪數滴盡江南幾秋雨山馬山牛誰得知山人野獵來驅
馳蛟潭仙窟探莫測徒爾幻變將何爲山川之靈扶輿之

真萬物不能得而乃鍾於人前有密國之父子後有文定之弟兄又有空青溫毫畱遠之諸孫清風高節磊磊臨門庭矯如天馬空中行奔騰弄影天下驚衆流憧憧走復迎我懷斯人壯心悠然今我不見邈乎千年結爲秋空月流作蟠龍涎軍峰山山高不可攀斯人一去何時還

廖紀

紀字惟修九江人宏治十八年進士歷官兵部工部郎中執法忤權勢出知延平平陽府皆有聲進廣西副使卒

圓通寺

得道高僧自不羣坐中禪寂未相聞齋心已許同天柱按

指猶能解世紛花繞塔前常作雨磬飄空外半和雲何當
了卻人間事閒伴蒲團坐夜分

傳元

元字冠卿新喻人瀚子宏治十八年進士改庶吉
士授監察御史視京畿學政嘉靖中謝病歸

題黎念齋侍御驄馬行春圖

青驄蹀躞烏臺馬獨立空羣歎知寡昔日來從大宛西長
鳴不困風塵下繡衣御史志澄清銜命獨乘驄馬行揚鞭
曉發都門道玉勒銀韉照錦纓此日追風疾如駛攬轡還
看士民喜嚴霜落盡春草生踏遍江南數千里

樂護

護字鳴殷號木亭臨川人宏治十八年進士歷知
宣城山陰縣擢給事中前後糾劾疏十數上擢光
祿卿以通天文兼欽天監事五星聚營室上疏以
修德爲言下錦衣獄出知宿州歷陝西叅政歸有
木亭雜藁

懷鄉

窮愁淹逆旅寂寞送芳春綠樹江南夢紅塵薊北身黃雲
熏餅餌白雪捲絲綸細草松陰下農歌隔水濱

病柬宋以賢

僻邸寥寥客影孤苔痕冉冉上階除可憐杜子貧多病解
使韋郎迹也疎蟬耳自鳴從亂聒鶴肩相對最清癯蓬門

擬爲君來啟已向鄰牆問濁醅

思家

濕雲暗低簷悲風動高閣冷坐悄無言淚與簷花落

絕句

夜夜風霜趁早朝耳輪生瘡鬢毛焦蘇秦莫謂西遊困身
上征裘是黑貂

羈思無聊獨倚楹高城坎坎發寒更誰言海外山如劍解
斷愁腸是鴈聲

贈別葉掌科出守福州

與君同年友情誼如弟兄况復官諫直出入同朝昏君今
別我去何以慰思存願君慎水陸平安在舟輶推心宣聖

化爲國培本根佳譽播九垓出自田野言東海有鯉魚潮
水通江濱殷勤裁尺素慰我相思魂暝色催驪歌使我聲
欲吞蘭舟且停櫂盡此筵中尊作詩發深衷所愧非瑤琨

和章汝明有懷

冉冉青春邁悠悠白髮生有懷憐室邇無累得身輕才拙
排投棄朋稀絕送迎幽軒終日坐烏兔任縱橫
種種頭顱異平生祇可憐功名存薄命身世任流年忽忽
恒多病休休却是仙宛然在林下只是未歸田

寄大夏博士弟

鄉國經年絕信音潞河秋令怪魚沉病來只有思鄉淚老
去空存報國心薄宦悠悠成底事浮生碌碌漫侵尋歸期

不負高平路青蔗黃柑酒共斟

過秦嶺謾興

平生蹤跡遠三秦垂白西來愧此身
甲第年深無故舊鄉園路遠絕交親
南音切切難爲聽孤鴈寥寥孰與鄰
宦况蕭條鄉思苦秋風孤負澗邊蓴

窮山古木縱橫老倒旣無匠石之睨
又無薪蒸之取噫地實爲之物何與焉

秋雨牀牀屋漏時斧斤何處覓棲楣
可憐此地參天幹老向深山世未知

和王少泉

偶嫌匏繫出林間竟逐蓬飛不可閒
泱泱風塵隨馬足茫茫

茫雲海隔鸞班豈能宿莽荒南畝只恐移文榜北山況是
天涯當歲暮歸心夜夜夢鄉關

安居

解組歸來就一廬生涯隨分度流年楓林鼓吹晨趨社蒲
浦笙歌晚競船蜜洞花香蜂宛轉月梢松動鶴盤旋只愁
荒歲多饑餒紫萼黃精間薄饌

聞吳黃洲病甚短述奉問

風雨江湖返故園聞君調理誤寒溫淵明幾日無詩興子
美多時廢酒尊天上神仙皆換骨海中琪樹亦移根從今
便是長生侶看取金剛萬古存

和吳黃洲山居

卜築東山地頗清浮生光景半陰晴莊周物外逍遙樂陶
令貧中淡薄情鶴影松梢高宛轉蜂聲花蕊細唧唧園林
有趣心無慕坐盡斜陽月又生

避地感懷

清泉白石萬山春晚節那堪傍市塵祇謂賤貧堪肆志豈
知離亂最傷神門前羅雀安身好池上觀魚入夢頻一室
琴書難便棄故園東望卽沾巾

贈鄧寫真

縑素風流四海濱十年寫徧滿朝真偶來避地淹留處亦
貌休官寂寞人亂後形容吾獨老閒中氣味自相親題詩
我亦爲君贈翰墨丹青各有神

贈廉士

廉節孤風世罕論
黃河混混自朝昏
先生獨愛寒泉水
照見伊郎萬古魂

庭中獨坐聞鳥鳴偶成

好鳥何方來愛我
庭中樹間關肆好
音葉密不知處斐
然發新吟詩成鳥
飛去去來本無心
悠然見天趣

夏日卽景示新鑪

獨坐庭陰晝日涼
一樽濁酒一爐香
屈平何事疎漁父
陶令從來喜杜康
霖雨過時田已澇
詩書到老味偏長
殷勤莫負而翁意
瞬息蟾宮桂又香

安拙

意氣當年作郡時
盤根錯節似枯枝
而今老去無能事
閒向松陰伴鶴嬉

秋雨

萬里金風響暮林
滿天涼雨氣蕭森
梧桐葉上聞人淚
鴻鴈聲中旅客心
韓子短檠情漸永
班姬紈扇怨初深
蓴鱸紫蟹無消息
得意鴈鵝報好音

謾興

人生適意最爲難
富貴文章際遇間
夢境引長無實用
仙家促短有何權
管寧一世羈遼客
諸葛終身累漢官
曾似太平耕釣叟
一郊春雨月明灘

巖 嵩

嵩字惟中分宜人宏治十八年進士改庶吉士授
編修累官禮部尚書少師武英殿大學士有鈴山
堂集

溪上風雨來颼颼篁竹亂油雲翳層峰對面隔霄漢鳥道
紆百盤龍門在天半佳期恨綿邈寒望增淒斷下馬憇林
居一顧屢長歎自無飛仙術安得凌絕觀

金山

寺擁金山古江流碧海深千年此形勝詞客幾登臨波浪
浮香閣魚龍聽梵音晨風渡舟楫真有濟川心

西陵觀月

萬古秋天月西陵午夜看影流蒼柏罅光滿碧雲端節序

逢搖落山河對鬱盤憑高瞻玉宇正憶鳳樓寒

崔子謝病還懷寄

相送出郊寺獨歸愁郭門春城涉遠道朝雨戀芳樽幽夢
時或到素心誰共論若爲經濟略歸臥水雲村

過彭城

十月彭城水臨觀勢渺漫客帆牽樹杪日夕畏風湍汴泗
流爭長魚龍臥未安無人守茅屋寂寞傍江干

發宜春風雨枉諸公出餞別後懷寄

出郭衆峰曉蕭蕭風樹鳴嶺危攀磴上橋斷涉溪行四牡
勤王事三湘問楚城郡齋山霧裏回望渺層城

盧溪謁周元公祠

古鎮無監稅高賢有奉祠位卑名德重世遠士民思風月
盧溪迴衣冠宋代遺停驂肅瞻拜敢惜去程遲

石期驛逢李明府

清苦東安令心期得共論官看銅綬貴貧惜布袍溫野樹
依巒嶂春江對驛門天涯一攜手風雨送離樽

同徐郡侯登浚渠亭

徐侯亭子李侯渠水石新呈宿莽餘秋淨野田聞鶴語雲
深仙洞隱龍居驅馳暫駐三湘節登賦初陪五馬車此日
佳遊習池共他年故事峴山如

山塘

山塘深且廣邈迤抱山麓隔浦見人家依依桑柘綠

出仰山

鐘聲在山間客子出山去細雨濕春衣新寒入高樹

送顧使君華玉赴全川

吳客孤帆楚水涯碧雲千里度長沙
湘山獨夜看明月莫聽猿聲便憶家

東堂新成

無端世路遶羊腸偶以疎慵得自藏
種竹旋添馴鶴徑買山聊起讀書堂
開窗古木蕭蕭籟隱几寒花寂寂香
莫笑野人生計少濯纓隨處有滄浪

揚州

親憶瓊花色橋憐萬柳陰蕪城舟夜月懷古一悲吟勝蹟

那堪問長江獨至今波間飾龍艦早晚翠華臨

韓次靈川懷寄師舜天益二鄉丈

天南歲晚更依依朔雪寒雲遶樹飛投館驚看風土異臨
觴悵憶故人違情同灘水仍西注身似春鴻向北歸想見
郵亭頻駐馬獨吟千嶂已斜暉

蕭子卜居梅林賦贈

溪上梅花玉作林溪邊茅屋苦寒侵孤山倚棹逢詩興
水移家見客心日暖漁歌來浦溆雪晴花色上衣襟風塵
擁傳勞爲郡時向滄洲寄一吟

寄壽少傅遂翁先生

累朝望重經綸地五畝怡情水竹間天下正須安石起維

中猶放凍翁閒詩尋丁卯橋邊宅舟放金焦寺裏山毬馬
如星春似海隱園高會渺難攀

見用修贈張生詩和以寄之

文酒高懷強自寬風烟異域若爲歡哀歌漫引馮驩缺感
遇空彈賈禹冠梁月漸低回遠夢塞鴻初至得新翰春愁
只恐銷客鬢莫向天涯重倚欄

無逸殿直舍和太師夏公韻

燈燭通宵晃禁廬霧窗雲閣近宸居瑞烟入座香浮苑寒
影窺簾月到除綵嶺乍聞丹鳳吹穀城先訪赤松書歸來
未向人間說天語親承燕對餘

贈盧沅卿司業

南舟遙問秣陵程北客初諳作宦情海近雲霞連北固宮
深鐘漏隱西清才名早已儲三館形勢真堪賦兩京自昔
成均師道重諸生今喜得陽城

李玉璧

玉璧名珙以字行泰和人宏治時贈南京翰林檢
討著有礪菴詩文集煮詩齋藁

觀山用劉敏求韻

松徑入古寺空翠濕人衣捲幔爽軒坐晨光尚熹微江山
畫圖裏直是無聲詩白雲滿空谷清風動禪扉泠泠千尺
泉流出深溪湄沿溪玩虛碧何憚路險欹山僧猶好客苦
苗未容辭抱琴佇歸徑緬懷鍾子期

潮山

昔年潮山岩今喜得深入禪菴不可求潮水久乃息竭來
初夏時勝遊及佳日山鳥雜管絃松風韻琴瑟林深鹿養
茸苔澁鶴畱迹靜境遺紛龐雅懷遂閒逸未訪羅居洞且
坐觀音石

徐自定

自定字慧後上饒人宏治中貢於鄉家世藏書與
弟自寧考訂辨難隱桃花灘以詩歌自娛

埕院弔吳忠節公

荒原風露此孤行埕院深深瑱碧毫一具衣冠藏萬古幾
回輟履拜三生終看宿草麒麟臥早見豐碑鳳臯成十七

年來誰骨立可堪尸跡祇如蠹

俞溥

溥字德洪信豐人陳白沙弟子宏治中以貢授涇
府審理正乞養歸闕館論道爲後學師式

董坑巖

風雨蕭蕭欲暮春弟兄連袂策枯藤只因乘興思携酒豈
爲談空別訪僧石佛不知誰悟得山靈應記我來曾興闌
明日尋歸路約柳隨花可尚能

張天仁

天仁字元德武寧人宏治中由貢士授蘭溪主簿
署縣事有政聲乞休不允棄官歸端重嚴謹爲里

中法鄉先生章公懋稱重之

歸里述懷

夙昔青雲忽暮年居官三載賦歸田應知病骨難支夜尚有吟懷可樂天新酒但畱賓客醉舊書須得子孫賢朝來窗外閒看鶴芋栗充饑便似仙

王烈

烈字正邦樂安人性敏行篤鄉黨比之王彥方宏治中張東白薦修江西志又薦修大明會典徵至而卒有諱樂集及江西文獻集

南康道中

客路梅關北歸心柳岸邊路遙頻問驛步澀只思船野燒

窮秋地寒風小雪天老兵還識我相對笑華顛

唐 禎

禎永寧人宏治中貢士授漳州訓導以老歸

雜詠

萬仞重岡盡晴光作翠屏鐵崖排岫嶂石壁護林厠鳥道
穿雲暗龍潭帶雨腥徘徊此招隱山嶽自鍾靈

迢遞空山路泉甘漱玉漿岫雲飛澗谷林雨注田塘水上
龍吟笛松間鳥韻簫叢祠鈴語亂喚客又斜陽

黃體方

體方新淦人宏治中舉明經伴讀

玉山道中雪

仙山積雪更嶙峋誰賭瀛洲萬斛塵咫尺玉京天路在醉騎黃鶴趕仙人

官湖有懷

烟外平蕪十畝開尋秋曾上百花臺芙蓉日映紅雲合楊柳風翻翠浪迴流水小橋通畫舫綠陰幽徑歛深杯臨風試問歸何日結箇茅亭待爾來

南溪

縣溪南面秀溪環明月初生滉漾間微有煙波浮白塔寂無風浪湧銀山江橋隱若雙虹臥野艇歸來一葉閒樹色嵐光清似許何年把釣弄潺潺

彭箋古

箋古萬載人宏治中官汀州經歷

游謝山

躡足謝山上肩輿路幾程殘花四五樹啼鳥兩三聲雲向
山腰起人從樹頂行羽流如有約兩兩路旁迎

晏恭

恭字緝敬號松崖新喻人宏治中隱居不仕工筆
札喜賓客與黎鳳友善有松崖手藁

九日偶成

芙蓉綴錦菊團金此地登高足賞心一雨濕衣生暮色片
雲如蓋弄秋陰蟬吟老柳聲聲苦鴈落寒蘆字字沉不惜
西風吹破帽漫隨童冠陟遙岑

南山爲黎隱居求章題

聞說南山景最奇主人結屋此棲遲
閒中圖畫添青篠世外詩歌有紫芝
採藥不迷巖下路逢仙且看石邊棋
自憐歲月驅馳過杖履何緣得暫隨

種讀窩

種得梅花自一村半畊半讀足晨昏
老妻炊稻香能識稚子編蒲卷自溫
問字有人朝載酒催租無吏夜敲門
此窩便有堯夫樂高枕巖頭待曉暾

晏良弼

良弼號雪坡新喻人恭子

贈黎瑞

世情參透是寒溫學到希夷當草元萬壑松風吟白石一
簾花雨寫黃昏舉杯且勸客中客倚杖還尋村外邨只恐
野雲關不住夜來老鶴曾敲門

晏良用

良用初名才號北山新喻人恭子良弼弟性孝友
於書無所不讀爲當時所推有北山漫藁

春江送別

長亭送客東風前東風吹波打客船江天日落怕分手浩
歌一曲心茫然羨君欲跨揚州鶴壯志飄飄隘寥廓有身
不受纓冕羈拂袖江湖且行樂楚江空闊聽潮聲雲帆高
掛千里程勸君且盡船頭酒明日烟波空復情

東湖爲子質題

湖上風生波浩渺湖天空闊茅亭小四更雨歇五更晴擁
出扶桑湖面曉源頭水活春蓬蓬落花輕逐流泉紅雲樹
周遭隔烟火此湖似與桃源通愛湖主人志高絕結屋三
間傍林樾間移孤艇泛清波笑拂長竿釣明月客來載酒
遊東湖呼童網取湖濱魚此中亦自足鰕菜世外何必思
菰鱸北山相去不踰里日聽菱歌岸邊起明朝摘我小園
蔬來就東湖飯菰米

西溪

城西有溪漾空碧萬古行雲流不極渚清沙白烟樹稠溪
上人家更幽絕縈迴遠自長江來雨聲怒激轟如雷桃花

隨波去不返漁郎欲入嗟無媒幽人此時寄踪跡茅屋牽
蘿傍溪石簑笠綸竿三十秋茫茫烟水無人識風吹黃蘆
天欲霜溪魚正肥溪菜香釣罷請君盡一觴醉但濯足歌
滄浪

五清書屋

寒潭碧浸青山麓水色山光照人目幽人卜地山水間構
得幽齋課畊讀四時佳木不可名半空蒼翠滿秋清蒼髯
百尺卷冰雪倒走十里聞松聲數竿修修隔牆竹長出龍
孫美頭角請看雛鳳正雙栖一夜清吟驚屬玉

山中次韻

結屋依雲靜凭欄野興孤鶴聲烟樹遠人跡雨苔蕪歲月

雙蓬鬢溪山一酒壺老夫無俗累耕鑿是良圖

北山詩卷乞傳石山題

鬢毛歷盡幾星霜數畝青山一草堂有子傳經貧亦得無
心用世拙何妨短筇春雨園蔬綠破帽秋風野菊黃柱史
片言如見贈白雲從此貯詩囊

可圃觀蔬

拂袖歸來學種蔬故園心切宦情疎家貧欸客和烟采地
僻呼童帶月鋤幾度清霜催敗葉一番疎雨長新蘆滿前
生意知誰領曾有人來抱甕無

漫興

年來新製芟荷衣愛向門前看翠微石徑雨餘山果落竹

籬烟淨野禽飛

初夏山居

幽棲地僻往來稀老去寧嗟與世違
新水池塘人寂寂綠陰門巷燕飛飛
不妨木石長爲侶已厭風塵久息機
更喜身閒無外事眼明林壑又斜暉

黎遠甫

遠甫號松澗新喻人與晏北山唱和

題北山卷

丹崖翠壁倚元空秀出東南第一峰
晴雪更添茶蘚冷夕陽都爲畫情濃
閒移石几停仙鶴愛看湖隄長籊龍
白髮來遊知有幾此間雲鳥亦從容

黎 珙

珙字廷器新喻人

清風亭

簷虛無鵲午亭閒草色簾光掩映間客到也知梅作主地
平須借石爲山情無可況儒家味心豈能移鏡裏顏不信
江湖天更遠月明清夢幾朝班

黎仲敦

仲敦號五橋新喻人

和羅南澗早春郊行

山柳斜連一里坡野人門巷隔烟蘿
瓦盆得酒堪畱客蠟屐尋春好放歌
花發舊枝都滿路雪消新水已平河
東風

離落紅蓮連葉色分來蛺蝶多

黃濟

濟字子舟信豐人少力學窮究經史多所闡發邵
二泉推重之

金鐘山

不見招提倚翠微密衫疎竹掩柴扉細攀蔓草尋迴磴旋
拂蒼苔嘗釣磯老石有緣聽佛法飛塵無路上僧衣分明
不是人間世怪底遊人屐印稀

徐宏

宏號希齋貴溪人家貧嗜學從胡敬齋遊

送敬齋胡先生出蕪溪

江上蘋花一棹移
津頭弱柳萬絲垂
先生鴻鵠有歸志
弟子驪駒爲別辭
劍拂明星時自看
琴彈淥水少人知
西風爲掃雷賓榻
重約秋來莫待遲

徐巖

羣峰何崔巍一壑特蕭爽
寒瀑鳴笙竽晴雲捲簾幌
朋來愜素歡地僻寄幽賞
逸矣懷前修絃詩結清響

劉魁

魁字煥吾號晴川泰和人
敵子正德二年鄉舉授
寶慶通判擢工部員外郎
上疏諫世宗徙雷壇廷
杖下獄與楊爵周怡獄中
講學有神降於此乞宥
三臣得旨釋放尋復逮繫
後以宮災釋還隆慶初

追贈太常寺少卿有晴川漫藁

答鄒東廓歐陽南野古城寺寄示諸生詩

蕭散惟林泉清幽復寺觀物理付鳶魚吾道隨童冠無我
乃爲虛有心卽致玩雨久必成霖日中自然肝變易以從
時何用增憂歎

過德州次訥溪韻寄斛山

纔過滄州又德州綠楊堤岸菊花秋未論秦楚萬餘里且
共風波一葉舟農圃漁樵俱是侶江湖廊廟敢忘憂獨憐
青脚差還健有約同登華岳遊

誕日有感

罪戾寧無禁恩還未有期久違桑柘敬深愧蓼莪詩此地

逢生日何年是死時悠悠天地恨種種鬢毛絲

癸卯元日獄中

去年此日綴朝班稽首相呼仰聖顏禮樂已追三代上樓臺都在五雲間一人有慶夔龍拜四海無虞虎豹開今日鼎臣幽繫處鐵門空望涕潛潛

舟至螺川聞復遣校追回卽呈馳就繫寄兒姪輩

廿載君恩天地大百年身世羽毛輕孤臣底事勞明主萬里何心保此生老眼不揮兒女淚剛腸難制別離情丁寧此後無他語莫負廬陵忠義名

彭韓

韓字世望安福人正德二年鄉舉爲衡山令多惠

政厯知靖州乞歸自稱石屋山人與羅洪先鄒守
益相切劘晚年自爲傳志祭文邀同志作別端坐
而逝

懷念菴太史

每爲思君坐晚霞那知人境卽天涯可堪山閣連旬雨又
是春風一晌花何處清江橫浦樹誰家明月映溪沙竹巖
花谷無窮意長望公來點物華

吳天祐

天祐字吉甫豐城人正德二年鄉舉官知縣

和答同年徐豐厓

勞生會晤豈易得別十五年方一來故人幾人道相合今

江西詩徵

卷五十四 明十六

詩

夕何夕樽同開感君情深愈於舊使我樂極翻成哀
天空月明耿長夜梧葉蕭蕭飛露臺

戴冠

冠字仲鵠吉水人正德三年進士授戶部主事以
國用不足建言議罷新庫貶廣東烏石驛丞嘉靖
初起戶部員外出知延平府改蘇州終山東提學
副使有達谷集

按四庫書目作信陽人茲從
通志作吉水人河南籍收入

曉發

村雞喔喔啼取火照行李隔籬謝主人出門渡溪水仰觀
雞浮嶺白雲猶未起

立春日舟中題

作客同無地他鄉空復春
舟中兒女大天末歲時新
樂事喧殊俗窮愁縛達人
椒盤懷故里腸斷白頭親

南夏

不作炎州客那知宇宙偏
日車淹北戶火樹爍南天
氣溽乘宵雨雲蒸挾暮烟
波斯夸白氎出入不曾捐

寄王德徵登州

王子十年別封書萬里來
乾坤知汝在涕淚向誰開
海國青春隔天隅白髮催
相思一搔首獨上越王臺

人日游石磑

人日尋春到海隈新年物色太相催
風吹燕子家家入暖逼桃花樹樹開
久住山林殊自適頻來峒谷更無猜
黃柑

白酒能消渴盡日松間坐不回

雨晴出左掖

北闕春雲散曉扉西山雪日弄晴暉雨聲恨不連三日松
樹須教過十圍歲遠玉螭書未有畫長金馬詔全稀侍臣
欲老惟疎放自歎從容退食歸

贈甘惠州

四面雲峰面面開使君花底放衙回人生豈必二千石只
看羅浮也合來

歐陽鐸

鐸字崇道泰和人正德三年進士授行人上書論
事歷副都御史巡撫陝天減賦稅裁郵置進南吏

部侍郎引疾歸卒贈工部尚書諡恭簡有集

次萍鄉

明發宣風館秋陰暮復朝雲昏山欲斷泥濘路偏遙近縣
峯頭塔橫江屋底橋舊時銅漏刻強半土中焦

十二日風雨次宣風館王伯安投詩有天際浮雲生
白髮林間孤月坐黃昏之句余用其韻

馬蹄沿路踏霜痕野水橫流一段渾雨戒關河中置驛幾
家雞犬自成村枕邊聽水塵懷淨山頂看雲望眼昏愧是
宣風天萬里幾人此地漫消魂

熊相

相字尙弼高安人正德三年進士歷官御史有能

名居鄉尤爲士大夫所重嘗修郡志

仙巖洞和韻

景入仙巖洞皆鴉壓樹低路從丹井畔僧坐水雲西草沒
無人跡林深有狄啼孤峯成石笋此筆倩誰題

黎龍

龍字乾德號念齋新喻人鳳弟正德三年進士官
至廣西平樂副使剛方廉厲忤時宰免官歸作愛
日堂奉母宗黨皆稱之

致仕述懷

脫却華簪便布衣南山茆屋北山薇十年踪跡真如夢半
自頭顱亦可歸猶愛園林開菊徑且將池館當漁磯閑情

盡付東風外
花落花開只掩扉

過田家

竹籬茆舍自成村
雞犬聲多晝亦聞
秧綠漸分池面水
麥黃初割隴頭雲
不知帝力歌何有
且喜田家酒易醺
我欲躬耕悲老大
逢人只誦勸農文

黎伯思

伯思號直溪
新喻人
龍子
歲貢
官訓導

木棉花

木棉花發白如脂
點綴青條分外奇
樸素不同桃李豔
輕盈原是雪霜姿
九州黎庶皆衣被
六禮繅盆盡蘭絲
統綺何人念機杼
舒人聊自續幽詩

江西詩徵卷五十四